

Beirniad – Iwan Stanley

318. Creu Gwefan Bl 6 ac iau (Grŵp neu Unigol)

Roedd llawer o gynnwys diddorol ar wefannau'r categori hwn, er bod tueddiad i ganolbwyntio ar themâu sy'n amlwg yn ymwneud â'r cyfrwng ei hun, fel technoleg a'r dyfodol, a phrosiectau dosbarth yn hytrach na diddordebau'r plant. Byddai wedi bod yn braf gweld rhagor o gyfraniad creadigol gan y plant eu hunain ac nid dim ond cynnwys oedd i fod i'w haddysgu. Wedi dweud hynny, mae'n amlwg bod sawl grŵp wedi cael hwyl arni wrth gyflwyno gwybodaeth mewn dulliau gwahanol a chreadigol. Roedd sawl safle yn cyflwyno pytiau o wybodaeth am bwnc penodol, a'r gorau o'r rhain oedd y Dinosoriad Direidus. Mae'n gyfuniad syml ond ddeniadol o luniau, graffeg, fideos, animeiddio, ffeithiau difyr a jôcs gwirion. Da iawn am lwyddo i greu profiad amlygyfrwng sy'n addysgiadol ond ffraeth. Roedd Y Dyfodol Yn Ein Dwylo yn mynd i dipyn mwy o fanylder ar bwnc diogelwch arlein, ond efallai yn colli rhywfaint o gymeriad y cyfranwyr oherwydd hynny. Serch hynny mae'r afatars fideo yn syniad da ac effeithiol, a'r cynnwys a'r adnoddau yn gynhwysfawr iawn. Clod arbennig i Caleb, yr unig ymgeisydd i gôdio'r holl safle â llaw yn hytrach na dibynnu ar blatfform cyhoeddi fel WiX neu WordPress. Mae'n amlwg bod ganddo sgiliau technegol arbennig, ac wedi bod yn brysur yn rhannu ei frwdfrydedd ag eraill yn ei glwb côdio. Un o raglennwyr disglair y dyfodol.

1. 318/3 Dinosoriaid Direidus

2. 318/5 Y Dyfodol Yn Ein Dwylo

3. 318/4 Byd Caleb

319. Creu Gwefan Bl 7, 8 a 9 (Unigol neu Grŵp)

Dim ond tri gynigiodd yn y categori hwn, ond roedden nhw'n gynigion gwahanol iawn. Mae oriel Gwion yn llawn lluniau lliwgar o Ddinbych y Pysgod ac mae'n amlwg bod ganddo ddawn gyda chamera a llygad am lun. Byddai wedi bod yn dda cael gwybod mwy am gefndir ei luniau a'i ddiddordeb mewn ffotograffiaeth i ychwanegu at y lluniau ei hunain. Roedd lab Dyfodol Inc yn gyfuniad diddorol o wefan addysgiadol a gêm, gan ddefnyddio'r llywio i gyfleu gwybodaeth mewn ffordd wreiddiol ac adloniadol. Syniad da, gyda golwg syml ac effeithiol, ond roeddwn i eisiau archwilio rhagor o ystafelloedd y labordy. Roedd Bwyd Blasus Iachus yn edrych yn ddeniadol iawn, gyda lluniau trawiadol o dyluniad glân, ffresh, er nad oedd pob dolen yn gweithio, a bod angen ychydig o waith tacluso mewn mannau o bosib. Adeiladwyd y tair safle ar wefan WiX, sydd yn cynnig templedi hawdd eu defnyddio, ond nid y profiad gorau i'r defnyddiwr o reidrwydd – does yr un o'r gwefannau yn gweithio'n iawn ar ddyfeisiau symudol er enghraifft. Byddai wedi bod yn braf gweld amrywiaeth o ddulliau creu gwefan, ond roedd cynnwys a syniadau da yma.

1. 319/2 Dyfodol Inc

2. 319/1 Tu ôl y Lens

3. 319/3 Bwyd Blasus Iachus